

RIFLESSIONS SUL “PLAN REGOLADÔR DIOCESAN”

Premesse

° Dutis lis istituzions là che l’om al à une part impuartante a van sogjetis a moments di esaltazion e di strache. O pensi che la nestre diocesi di Udin, dopo dai granc’ moments de senblee dai predis dal ‘75, dal taramot dal ‘76 e de senblee dai cristians dal ‘77, là che la provedense o il destin a vevin puartât a un moment di grande tension spirituâl o ideâl, cumò e steti passant un moment di grant câl di idealitât. Nol è che i predis o i laics no fasin miôr ch’a puedin par tirâ indenant. Al mancje un spirt unitari, chel “concursus in idem” ch’al sares il ben di cheste glesie di Diu là che duc’, predis e no predis, a vuelin dâ une man par che il Vanseli al continui a fâ di levan te nestre storie.

Lis cuintriprovis lis vin te mancjance di dibatiment e di une sane oposizion e tal grant vuet e te indiferense scuasit gjenerâl ch’e à compagnade la conclusion de sinode. No vuet culi dâ colpis nè di une bande nè di cheâtre. O vuet palesâ une realtât e cirî di no fâ un pecjât di omission tasint sun chê realtât che nô le vivin ogni dì su la nestre piel. Il fat che i predis a tasin e che i laics plui impegnâts no protestin nol va cjapât di sigûr come un segnâl di adesion e di aprovazion di ce ch’al ven fûr dal centro (centro diocesan, ch’al revoche e al copie il centralisin talian e roman). Di bogns furlans, a rinuncin a fâ la vuere, ma no si pò cjapâju tanche argument a favôr. O pensi però che une glesie strache o rassegnade o rinunciatarie no seti la miôr promesse par frontâ il toc di storie (e di Storie sacre) che o vin denant.

° In te glesie duc’ si è fîs e duc’ si è paris, tal sens che la glesie nus fâs e le fasin, nus parturis e le parturìn. Chest nus dà il dirit di dí la nestre, cun umiltât e cun corajo, savint di vê spindude e di jessi disponûts a spindi par jê la nestre vite, se il Signôr nus darà la gracie e la costance.

° No vueti meti in dubit la buine fede di chêi, vescui e presbîtars, ch’a cirin di prontâ soluzions ai granc’ problemis che il mont di vuè nus oblee a cjapâ. O crôt però che chestis soluzions no varan esit, ma che ansit a saran un rimiedi piês che no il mâl, se no tignaran di voli la Peraule di Diu scrite tal so libri e la Peraule di Diu che si fâs cjâr e sanc ancje tal nestri timp e framiec dal nestri popul. Mi pâr di dí che i provediments in vie di preparazion (ridistribuzion dai predis, rotazion dopo dai nûf agns, il gnûf efficientisin, une razionalisazion de pastorâl che no rispiete nè la nostre realtât concrete nè lis graduatoriis ben precisis dadis dal Vanseli) no vetin daûr di sè nissune eclesiologie, o amancul no la nestre, a setin progjets vecjos, ch’a partissin simpri e dome di un implant clericâl che nol è plui, no setin rispietôs des diviersitâts di zonis e di personis, no partissin di chei ultins che il Vanseli ju puarte par prins, e po no i lassin nissune libertât e fantasie al Spirt, ch’al sofle là ch’al ûl, cuanche al ûl e cemût ch’al ûl. Interpretâ i segnâi dai timps e dai lûcs nol è dome un at di docilitât al Spirt e di professie, ma gracie grande e grande sapiense.

° I nestris sorestants a partissin cu la idee di fâ il ben de glesie. Chest no si pò metilu in dubit. No simpri però a cognossin la realtât concrete de glesie e no simpri no son libars tal sielgi ce che al va ben in cheste glesie e magari no in dute la glesie. Tal prin câs o cirarìn di inluminâiu; tal secont o prearìn ch’a vetin

coraggio. “Il Spirtu Sant si è impegnât a assisti il pape e i vescui, no a informâju”. Lu à scrit don Milani.

° No esist , tai fats umans, une sole soluzion. Pa la cuâl no pensi che e seti rissolutive chê dai vescui, di planificâ la diocesi par podê rivâ a une planificazion pastorâl, come che no pensi ch’è seti rissolutive chê contrarie. Si tratarâ di scoltâsi, di lavorâ insieme, di risprietâsi e di cirî il ben de nestre glesie.

Tal presentâ chestis “riflessions”, o domandi che chêi in alt no cjapin la mê “disubidience” o “critiche” come un at di disistime tal lôr confronts. La miôr famee no jè chê là che un sôl al fevele e duc’ cheâtris a tasin, magari rugnant sotvie, ma là che in duc’ si cîr di cjatâ fûr une strade che mortifiche il mancual possibil lis personis e lis situazions par daj place al Spirt, ch’al sofle, ch’al cree, ch’al ricree.

° La part “pratiche” no jè mancual inpuartante de part “teoriche” o eclesiologiche, ma e ven dopo e si pò simpri cjatâ fûr cualchi coretîf, cuanche si à clâr in tal cjâf il telâr eclesiologic che si intint operâ di conseguense.

La campagne e jè di Diu.

Al è Diu il paron de campagne e la glesie no pò fâ i lavorents ma dome domandâju. Che se lui no ju mande, non vegnin.

Il ream di Diu al è plui grant che no la glesie.

Il ream di Diu al è plui grant che no la glesie, che e jè un sacrament, un segnâl, un mieç. No sarâ e no podarâ par mai jessi la uniche strade di Diu. Senò e sares plui grande di lui o come lui, e Diu al vares falide la sô vore parceche nè prin nè intant nè fûr de glesie no duc’ i oms a varessin podût vê la salvece. E chest al va cuintri de volontât positive di Diu, ch’al ûl che duc’ a si salvin.

La glesie e à di cjapâ su dut il bon ch’al è tal mont.

La glesie, insedade tal timp, e à di cjapâ su (“assumere”, “incarnare”) dut ce che di bon il timp al dà. La glesie, insedade tun lûc, e à di cjapâ su dut ce che di positîf al cres in chel lûc. Cence cheste atenzion riguardose, risprietose e afetuose des coordinadis di timp e di lûc la glesie no jè sul stanp che Diu le à volude e metude.

La tradizion de glesie e à di jessi dinamiche.

La glesie, ancje se e partis di Crist muart e resurit, e cjamine cui pîs dai oms e a scuen jessi sâl di cheste tiere e lûs di chest mont. Pa la cuâl, cence tradî la sostanse, e à di conpagnâsi di un continuo, cence rinuncia a nissune veretât e cence fâ diventâ veretât une robe che no jè, a chest mont e a chesc’ oms. Semper idem al è il stes che semper differens, parceche in te glesie a esist une fuarce, la tradizion, che le fâs jessi, cul jutori di Diu, simpri conpagnade a ogni ete e a ogni situazion, e duncje simpri difarente e gnove. Dome cussì e pò mantignî la sô fuarce di segnâl, di sacrament. Un sacrament che nol significhe nuje al piert la sô virtût. Un mieç che nol jude nol è mieç.

La “rivoluzion” di Crist no à di vê pore des “rivoluzions” dai oms.

Dut ce ch’al sucêt in tal mont al sucêt par volê di Diu. E la storie dai oms, cun duc’ i limits e lis contradizions, e jè la strade là ch’al passe Diu. Pa la cuâl si à di stâ atents a di chesc’ granc’ segnâi gnûfs che la societât di vuè, a nivel mondiâl, nus sta metint sot dai vôi. Lis grandis rivoluzions economicis, sociâls,

politichis e culturâls no son mancul grandis des grandis invenziions e scuviertis. E come che la glesie no à nissune pore nè teologiche nè pratiche di doprà lis scuviertis e i vantaz de ete moderne, cussì no à di vê nissune pore di cjapâ su il mont di vuê, ven a stâj il mût di vivi, di resonâ, di rapuartâsi dai oms fra di lôr. Peraulis come democressie, laicitât, vualitât, paritât di dirits fra om e femine, dirits naturâi de persone e cetera no son par nuje mancul santis e sacramentâls o significativis di chês dal messâl. La glesie e à di doprà, tai siei rapuarts internis e esternis dut ce che il mont al à parturît di bon, par no ridusisi a vê un Diu cu la glesie e un Diu fûr o cuintri de glesie. Partant come che la glesie, par vieri, e scugnive jessi monarchiche, cumò e scuen rindisi 'e democraticitât. Dome che no à di fâlu par rassegnazion o par santescugne o par calcul, e mancul ancjemò par fente, ma cu la braure di une mari che à viôt che i siei fîs a son cressûts.

I carismis a son la rispueste che Diu al dà ai problemis di ogni ete.

Tai secui passâts, cuanche a nassevin problemis sociâi o religjôs e nissun no j dave une man 'e int, Diu al à fat flurî oms di coragio e istituzions providenziâls che j àn permetût al mont di sei inluminât de lûs di Crist e 'e glesie di no pecjâ di latitance o di omission tai confronts dal mont. I predis sul nestri stanp - o tridentins - a son nassûts cun cheste esigjence di dâj 'e puare int, par solit alfabete, il sun e il savôr de Peraule di Diu. Canonisâ ce che al à coventât une volte come ch'al coventas par sinpri al è un pecjât di idolatrie, parceche al fâs pleâ la glesie a une robe fate des sôs mans. Dut ce ch'al nas al à une fin, e chest al vâl ancje pes istituzions. Cumò la int e sa rangjâsi di plui, e jè pui istruide, e jè cressude e no à plui dibisugne nè di intermediacion o deleghe politiche nè economiche nè assistenziâl nè culturâl. Cemût si fâsial a dî che dome tal fat religjôs, te glesie, e à dibisugne di une deleghe par metisi in contat cun Diu e cui siei misteris?

La unitât si le à partint dal bas; la prepotense si le à partint dal alt.

La glesie no jè dome spice che si slargje viers il bas ma e jè ancje, e soledut, il popul di Diu che si dà dongje te fede, te sperance e te caritât. Là che si cjatin doi o tre tal non di Crist lì al è presint Crist, lì e jè la glesie. Chest al vâl soledut par chel grant fat religjôs, culturâl e uman ch'e jè la glesie locâl, che nol è nè just nè teologic clamâle particolâr, come un fruçon o une part di un dut. La glesie locâl e à un mût dut so di incjarnâ la Peraule e no si pò, in non di une unitât tatiche, dineâ une diviersitât dinamiche. La unitât no ven fûr par un befel dal princip o dal pape, ma par une consonance des glesiis locâls fra di lôr, cul Spirt che lis sburte e che lis jude a jessi dutune. Une unitât inponude no jè unitât, parceche no diven dal Spirt. E jè dome prepotense. E a reste sterpe, parceche Diu nol pò dâj seont. Alore une glesie, te sô vite, e fâs ben a cjalâ cun grande atenzion e fede i segnâi dai tims e dai lûcs, no maraveâsi se cualchi robe, che di âtris bandis e sflorege, lì di jê no cjape pît o e à finît di menâ. No dutis lis plantis a puedin nassi e cressi in duc' i tarens e a dutis lis altecis. Chest nus fâs sparagnâ un slac di tentazions di nivelament e di inpuartazion o colonizacion e ancje ungrun di rabiis e di aviliment. Par fâ un esenpli, pò stâj che il Friûl nol seti un taren adat pai seminaris e pes Azions catolichis. Al ûl dî che culi si varà di cjatâ fûr i predis e di stiçâ i laics al apostolât tun'âtre maniere. Senò si lavore mâl e dibant e dut al colarâ.

In Friûl il predi al è l'om de int no de istituzion.

Cjalant 'e storie di chenti, si po' dî che la int ur à volût ben ai siei predis, e tant ancje, come che e à stramaludide la istituzion. Al ûl dî che la int e sint la

dibisugne dal predi ma no ûl ch'al vegni fûr de istituzion o ch'al sei il so rapresentant. Al à di nassi dal popul, e alore lu tignarâ cont come la sô perle plui preziose, inpen di riverilu e di sopuartâlu come un forest ch'al ven a fâ di paron dome parceche al à i sigji de uficialitât.

Partî dai plui piçui par une sielte evangeliche.

Partint de base, o varin di partî de unitât plui piçule plui in là de famee, ch'al è il borc o la frazion, po o passarin al paîs, po il païson (il Friûl nol è fat di sitâts), po 'e sitât. Ognune di chestis realtâts e à une sô dimension religjose, come ch'e à une sô dimension culturâl e umane, economiche e sociâl. Si varà duncje no di dâur un cuc ai paîs plui piçui, ma a varan di jessi in teste de intenzion e dal servissi, calant par ordin che si passe ai plui granc', ch'al è juste il contrâr di ce che si sta proponint cumò.

La glesie e jè un mieç volût di Diu e no une realtât espotiche e assolude. E se la glesie no dopre, tal so operâ, il stîl dal Vanseli, al è clâr che Diu le condane, come ch'al condane un servidôr inutil e fufignot.

Par liberâ, si à di jessi libars.

Cuanche une istituzion no jè libare, no à di vê la pratese di liberâ cheâtris.

Se no si rive par sè, no si à di inludisi di rivâ ancje par cheâtris.

Cuanche une istituzion no rive adore di rangjâsi par sè, al sares un tentâ il Spirt pratindi di rivâ ancje par cheâtris. Par chel no pues acetâ che e seti la istituzion gleseastiche, che no rive nancje a stropâ lis sôs busis, a pratindi di stropâ chês di cheâtris. Il vescul ch'al cîri di pensâ pai siei predis, ch'a son stracs e avilûts e cence sperance, e ch'al lassi che il Spirt al lavori il cjâf e il cûr de int par ch'a puedin puartâ indenant il ben de religjon, come ch'a àn puartât indenant âtris valôrs, spes cuintri de volontât stesse de glesie.

Nol è il vescul ch'al à di salvâ.

Se la glesie e jè di Crist e Crist al è di Diu, il vescul nol à mai di dî che lui "al scuen proviodi par cuatricentmil di lôr". Lui ch'al cîri di proviodi par sè e pe sô barache. E Diu ch'al proviodi par duc'.

No confondi la funzion dal predi cui stanp dal predi.

Se cumò la int no va in seminari, al ûl dî che no sint il predi tradizional come un valôr. Senò no lu molares. La figure e la funzion dal predi o dal anzian e sarâ simpri tune comunitât. Ma al sares un delit e une miopie peâ une funzion, ch'e covente, a un stanp, simpri acesori e secondari. Si trate alore di cjatâ fûr, o, miôr, di lassâj 'e int la sô libertât di cjatâsi fûr un sorestant de sô comunitât religjose, come che àn proviodût in âtris cjanps. Nol è just che il vescul e i siei gjanissars, che no rivin a proviodi lôr, a vetin la pratese di dîur ai cristians ancje cemût ch'a àn di fâ. E àn di lassâju libars, e lôr a fasaran.

Il pecjât dal clericalisin, come duc' i pecjâts, si lu pae.

Se vuè no van predis, pò stâj che ancje i predis, tal lôr comples, no vetin cuissà ce judât la int. E i pecjâts di prepotence, di insensibilitât, di pocje umanitât che tantis voltis ancje i ultins predis di paîs e àn scugnût fâ par ubidiense, o di vinars o di sabide si ju pae, parceche la int e à memorie di elefant. Salacôr, fra cualchi gjenerazion, cuanche ur varâ passade la fote, a

tornaran a vê gole dal predi-predi, e alore s'al tornaran a inventâ. Ancje te glesie a esistin i cors e i ricors de storie.

Ancje in te glesie, si impare fasint.

La int no si le use spiegant cemût che e à di fâ, massime i furlans. Si à di lassâju fâ. Sul inprin a stentaran, ma dopo a cjaparan gust, si sintaran inpuartants, a sintaran che e jè une robe lôr e le presearan di plui. E salacôr, fasint il predi tal lôr païs, a tornaran a vê stime ancje dai predis.

Prin di là a pitocâ, doprâ dute la gracie che si à in cjase.

Nol è nè onest nè serio lâ a cirî robe foreste cence volê doprâ o fin che no si à finît di doprâ dut ce che di bon Diu nus à dât. E tal consegnâ une glesie o une comunitât, al è miôr lâ daûr de leç di nature che no di chês ch'a vegnin dopo o di fûr vie. Tant a dî che un pari une mari di famee a vegnin prime de persone consacrade, e un dal païs al ven prime di un di fûr, magari plui studiât.

La pastorâl e domande continuitât.

Un predi al à di cognossi la sô int come il pastôr, se nol ûl ridusi dut a rude sacramentalisazion cence nè savôr nè calôr. Par cognossi, si à di vê un païs sôl o une sole comunitât piçule e si à di stâ il plui a lunc pussibil. Lu à capît ancje il Stât (seben che no lu met in vore) che un mestri nol à di vê plui di vinciecinc canais par classe e si à di cirî, par tant ch'al è pussibil, une continuitât didatiche. La plee ch'e sta cjapant pît te glesie, di fâj cjapâ su a di un predi un comun intîr e di fâlu girâ atôr pal Friûl ogni nûf agns, e jè une robe che si scualifiche dibessole, ancje cjalanle par ledrôs. Parceche e jè, oltridut, antievangeliche e disumane. Cun consequencis orendis: un predi ch'al à di cori atôr come un mat a fâ messis e funerâi fin che nol cole in svaniment o nol crepe; une int che no cres parceche no le lassin e no le fasin fâ; nissune voe, tal predi, di tacâ e di finî cuanche si sa che, sul plui biel, tocje molâ dut. Cheste mode, che e semee puartade indenat ancje de sinode, a puedin vêle inventade dome chêi che no àn fat in vite lôr, pardabon e a timp plen, i predis di païs; partant e va combatude come une tentazion, come une robe brute, rivant ancje e obiezion morâl in non dal Vanseli. Dome cussì si spera che chêi ch'a diregin stant in alt o ch'a ripetin ordins vûts di âtris bandis a cjapin finalmentri une strade contrarie.

Ogni riforme e à di jessì rispietose de diviersitât dai oms e des situacions.

Cualunque strade che si cjapi, nol à di mancjâ mai il rispiet pal om; ancje pal om predi. "Se par une regule o par une istituzion al mûr o al ven mortificât ancje un om sôl, al è za un presit che no si pò tolerâ". Lu à scrit Oscar Wilde. Rivâ a ingomeâ chei cuatri vecjuts ch'a son restâts e ch'a tasin dome parceche a son usâts a tasê o parceche a son ricatabii cul franc no jè une robe che j fasi onôr a cualchidun. Rispietin ancje la diviersitât des personis. Al è chel ch'al è fat pal moto perpetuo e chel ch'al à un ritmo plui lent; chel che si console tal mieç de confusion e chel che si cjate dome tal cidin; chel che j plâs meti man a mîl iniziativais e chel ch'al à nant fâ pôc e in profunditdât; chel che si afezione a un païs e chel che si afezione al messâl. Lassin amancul libertât, par che te glesie di Diu si sinti un savôr difarent di chel nivelant e massificant dal mont.

L'eficientîsin nol à parintât cul Vanseli.

Tal cjanp dal Vanseli e de glesie, l'eficientîsin nol dîs propit nuje, parceche la samente a cres ancje cuanche l'om al duar.

Omnis sacerdos, nullus sacerdos.

Se duc' a son predis, si piert ancje la bielece e la ricjece dal carisme. Il carisme dal predi (tal nestri câs, dal predi sorestant di une comunitât) al vâl s'al è compagnât dal carisme dal laic, come chel dal maridât al à di vê, dongje di sè, chel dal no maridât. S'ò volin doprâ duc' i carismis, o vin di rivâ a vê comunitâts cun predi e comunitâts cence predi, là che la part di predi o di anzian le fâs un o une dal paîs. Alore si viodarâ la difarense; alore si tornarâ a stimâ, s'al è il câs, il carisme dal predi; o, finalmentri, la comunitât si cjaparâ in consegne la sô glesie e il so paîs par no che j mancj il sostentament de Peraule di Diu e dai siei misteris.

O riscjâ o acetâ il faliment.

Se in tun paîs no si à un om o une femine in grât di sunâ une cianpane, di lei une pagine de Bibie, di dâ la comunione e di fâ la liturgie, al è dibant scanâ chei cuatri predis restâts sul front. Al ûl dî che no vin savût tirâ su nissun e duncje nol è il câs, ch'ò sin in pôs, continuâ par chê strade che no vin rivât cuanche o erin tanc' e fuarts. No sin adats par tirâ su famee. Salacôr lôr a fasaran miôr di nô. Le ipotesi plui nere, o sarin là, come cumò.

Il predi al à drit di puartâ al colm la vore scomençade cu la sô comunitât.

In chest mont, dut si pò discutilu, comedâlu, ganbiâlu in miôr. La soluzion prospietade, di fâ cori i predis pai paîs apene ch'a restin sfurnîts di titolâr, juste par dî di "vê in man la situazion", e jè la piês, parceche j puarte vie a un paîs il so predi, dividinlu a mieç o a un quart cun âtris comunitâts. Tal ultin, la prime comunitât e varâ pierdût il so pont di riferiment e une sô esperience pastorâl ben definide, e cheâtre no varâ vuadagnât nuje, dome cualchi messe, o, se al sune miôr, un toc di predi, che nol pò cognossi e nol pò jessi cognossût. In pratiche si piert in duc'. E chest al è plui grâf cuanche si ûl fâlu passâ come uniche e ultime pussibilitât dai timps di vuê, invessit di approfîtâsi di duc' chesc' spiei par ganbiâ solfe e sisteme, doprant dute la gracie di Diu che si à sot man.

Copiâ di mancul e doprâ plui i vôi e il cjâf.

Par chêi che a van disint che si à di copiâ lis esperiencis dai missionaris jù pes Africhis, ch'a rivin tun puest, a fondin une mission e po a van di un'âtre bande a fâ la stesse robe, girant di un continuo, al sarà ben ricuardâ che la nestre int e jè za cristiane. No jè dizune di religjon e di dutrine; se mai e jè passude o deludude o ingomeade. Duncje, lassanle lâ a cirî te sô memorie, e torne a supâ dut il savôr religjôs che e à cjapât su tai timps, fasinlu diventâ levan pai timps di vuê.

* * *

La propueste di vê paîs cul predi e paîs cence predi (magari dant une man a nivel tecnic sul inviâsi) e jè rispjetose e dai predis e des comunitâts e de int. No jè infalibil, no jè automatiche, no jè facil, ancje parceche si trate di ganbiâ mentalitât dopo cuatri secui di rût clericalisin. In chest il timp al è un grant miedi. Vuè cui si metial a vaî parceche no vin plui il re o parceche la int no dopre plui la cariole come mieç di traspuart?

In ogni câs, la propueste dal predi-elicotero no à avignî, parceche, fra cinc o dîs agns, o tornin a cjatâsi cun mancul predis e cun plui berdeis, cence vê

cunbinât o inviât nuje di bon. Cheste chî, di “molâ” lis comunitâts cence predi ‘e int e di lassâ che là ch’al è il predi al puedi lavorâ a timp plen, cun dignitât e responsabilitât e metint in vore dute la fuarce dal so carisme, o pensi ch’è seti miôr di cheâtre. E stant che lis circostancis di timp e di lûc no dipendin di me ma a son, e si à di tignilis sot voli, o crôt che ancje cheste e seti une reson amancul par pensâj sore.

Visepente, Madone d’avost dal 1988

pre Antoni Beline, plevan monogamo